

## Hajji

### *Rab ke Ghar ko Dubārā Banāne kā Hukm*

<sup>1</sup> Fāras ke bādshāh Dārā kī hukūmat ke dūsre sāl meñ Hajji Nabī par Rab kā kalām nāzil huā. Chhaṭe mahīne kā pahlā din \* thā. Kalām meñ Allāh Yahūdāh ke gawarnar Zarubbābal bin Siyāltiyel aur imām-e-āzam Yashua bin Yahūsadaq se muḵhātib huā.

<sup>2-3</sup> Rabbul-afwāj farmātā hai, “Yih qaum kahtī hai, ‘Abhī Rab ke ghar ko dubārā tāmīr karne kā waqt nahīn āyā.’”

<sup>4</sup> Kyā yih ṭhīk hai ki tum ḵhud lakaṛī se saje hue gharoñ meñ rahte ho jabki merā ghar ab tak malbe kā dher hai?”

<sup>5</sup> Rabbul-afwāj farmātā hai, “Apne hāl par ḡhaur karo.

<sup>6</sup> Tum ne bahut bīj boyā lekin kam fasal kāṭī hai. Tum khānā to khāte ho lekin bhūke rahte ho, pānī to pīte ho lekin pyāse rahte ho, kapṛe to pahante ho lekin sardī lagtī hai. Aur jab kōī paise kamā kar unheñ apne baṭwe meñ dāltā hai to us meñ sūrāḵh haiñ.”

<sup>7</sup> Rabbul-afwāj farmātā hai, “Apne hāl par dhyān de kar us kā sahīh natījā nikālo!

<sup>8</sup> Pahāroñ par chaṛh kar lakaṛī le āo aur Rab ke ghar kī tāmīr shurū karo. Aisā hī rawaiyā mujhe pasand hogā, aur is tarah hī tum mujhe jalāl doge.” Yih Rab kā farmān hai.

---

\* 1:1 29 Agast.

9 “Dekho, tum ne bahut barkat pāne kī tawaqqo kī, lekin kyā huā? Kam hī hāsīl huā. Aur jo kuchh tum apne ghar wāpas lāe use main ne hawā meñ urā diyā. Kyoñ ? Main, Rabbul-afwāj tumheñ is kī asal wajah batātā hūñ. Merā ghar ab tak malbe kā dher hai jabki tum meñ se har ek apnā apnā ghar mazbūt karne ke lie bhāg-daur kar rahā hai.

10 Isī lie āsmān ne tumheñ os se aur zamīn ne tumheñ fasloñ se mahrūm kar rakhā hai.

11 Isī lie main ne hukm diyā ki khetoñ meñ aur pahāroñ par kāl pare, ki mulk kā anāj, angūr, zaitūn balki zamīn kī har paidāwār us kī lapet meñ ā jāe. Insān-o-haiwān us kī zad meñ ā gae haiñ, aur tumhārī mehnat-mashaqqat zāe ho rahī hai.”

12 Tab Zarubbābal bin Siyāltiyel, imām-e-āzam Yashua bin Yahūsadaq aur qaum ke pūre bache hue hisse ne Rab apne Ḳhudā kī sunī. Jo bhī bāt Rab un ke Ḳhudā ne Hajjī Nabī ko sunāne ko kahā thā use unhoñ ne mān liyā. Rab kā ḳhauf pūrī qaum par tāri huā.

13 Tab Rab ne apne paighambar Hajjī kī mārifat unheñ yih paighām diyā, “Rab farmātā hai, main tumhāre sāth hūñ.”

14-15 Yoñ Rab ne Yahūdāh ke gawarnar Zarubbābal bin Siyāltiyel, imām-e-āzam Yashua bin Yahūsadaq aur qaum ke bache hue hisse ko Rab ke ghar kī tāmīr karne kī tahrīk dī. Dārā Bādshāh kī hukūmat ke dūsre sāl meñ wuh ā kar Rabbul-afwāj apne Ḳhudā ke ghar par kām karne lage. Chhaṭe mahīne kā 24wāñ dīn † thā.

---

† 1:14-15 21 Sitambar.

## 2

### *Rab kā Nayā Ghar Shāndār Hogā*

<sup>1</sup> Usī sāl ke sātweñ mahīne ke 21weñ din \* Hajji Nabī par Rab kā kalām nāzil huā,

<sup>2</sup> “Yahūdāh ke gawarnar Zarubbābal bin Siyāltiyel, imām-e-āzam Yashua bin Yahūsadaq aur qaum ke bache hue hisse ko batā denā,

<sup>3</sup> “Tum meñ se kis ko yād hai ki Rab kā ghar tabāh hone se pahle kitnā shāndār thā? Jo is waqt us kī jagah tāmīr ho rahā hai wuh tumheñ kaisā lagtā hai? Rab ke pahle ghar kī nisbat yih kuchh bhī nahīn lagtā.

<sup>4</sup> Lekin Rab farmātā hai ki ai Zarubbābal, haoslā rakḥ! Ai imām-e-āzam Yashua bin Yahūsadaq haoslā rakḥ! Ai mulk ke tamām bāshindo, haoslā rakḥ kar apnā kām jāri rakho. Kyoñki Rabbul-afwāj farmātā hai ki maiñ tumhāre sāth hūñ.

<sup>5</sup> Jo ahd maiñ ne Misr se nikalte waqt tum se bāndhā thā wuh qāym rahegā. Merā Rūh tumhāre darmiyān hī rahegā. Ḍaro mat!

<sup>6</sup> Rabbul-afwāj farmātā hai ki thoṛī der ke bād maiñ ek bār phir āsmān-o-zamīn aur bahr-o-barr ko hilā dūngā.

<sup>7</sup> Tab tamām aqwām laraz uṭheñgī, un ke beshqīmat kḥazāne idhar lāe jāeñge, aur maiñ is ghar ko apne jalāl se bhar dūngā.

<sup>8</sup> Rabbul-afwāj farmātā hai ki chāndī merī hai aur sonā merā hai.

<sup>9</sup> Nayā ghar purāne ghar se kahīn zyādā shāndār hogā, aur maiñ is jagah ko salāmatī atā karūnga.’ Yih Rabbul-afwāj kā farmān hai.”

---

\* 2:1 17 Aktūbar.

### *Main Tumheñ Dubārā Barkat Dūngā*

<sup>10</sup> Dārā Bādshāh kī hukūmat ke dūsre sāl meñ Hajji par Rab kā ek aur kalām nāzil huā. Naweñ mahīne kā 24wān din † thā.

<sup>11</sup> “Rabbul-afwāj farmātā hai, ‘Imāmoñ se sawāl kar ki shariyat zail ke muāmale ke bāre meñ kyā farmātī hai,

<sup>12</sup> agar koī shakhs maḥsūs-o-muqaddas gosht apnī jholī meñ ḍāl kar kahīn le jāe aur rāste meñ jholī mai, zaitūn ke tel, roṭī yā mazīd kisī khāne wālī chīz se lag jāe to kyā khāne wālī yih chīz gosht se maḥsūs-o-muqaddas ho jātī hai?’”

Hajji ne imāmoñ ko yih sawāl pesh kiyā to unhoñ ne jawāb diyā, “Nahīn.”

<sup>13</sup> Tab us ne mazīd pūchhā, “Agar koī kisī lāsh ko chhūne se nāpāk ho kar in khāne wālī chīzoñ meñ se kuchh chhue to kyā khāne wālī chīz us se nāpāk ho jātī hai?”

Imāmoñ ne jawāb diyā, “Jī hān.”

<sup>14</sup> Phir Hajji ne kahā, “Rab farmātā hai ki merī nazar meñ is qaum kā yihī hāl hai. Jo kuchh bhī yih karte aur qurbān karte haiñ wuh nāpāk hai.

<sup>15</sup> Lekin ab is bāt par dhyān do ki āj se hālāt kaise hoñge. Rab ke ghar kī nae sire se buniyād rakhne se pahle hālāt kaise the?

<sup>16</sup> Jahān tum fasal kī 20 boriyoñ kī ummīd rakhte the wahān sirf 10 hāsīl huīñ. Jahān tum angūroñ ko kuchal kar ras ke 100 liṭar kī tawaqqo rakhte the wahān sirf 40 liṭar nikle.”

<sup>17</sup> Rab farmātā hai, “Terī mehnat-mashaqqat zāe huī, kyoñki main ne patrog, phaphūndī

---

† 2:10 18 Disambar.

aur oloñ se tumhārī paidāwār ko nuqsān pahuñchāyā. To bhī tum ne taubā karke merī taraf rujū na kiyā.

<sup>18</sup> Lekin ab tawajjuh do ki tumhārā hāl āj yānī naweñ mahīne ke 24weñ din se kaisā hogā. Is din Rab ke ghar kī buniyād rakhī gaī, is lie ghaur karo

<sup>19</sup> ki kyā āindā bhī godām meñ jamāshudā bīj zāe ho jāegā, ki kyā āindā bhī angūr, anjīr, anār aur zaitūn kā phal na hone ke barābar hogā. Kyoñki āj se main tumheñ barkat dūngā.”

### *Zarubbābal se Allāh kā Wādā*

<sup>20</sup> Usī din Hajjī par Rab kā ek aur kalām nāzil huā,

<sup>21</sup> “Yahūdāh ke gawarnar Zarubbābal ko batā de ki main āsmān-o-zamīn ko hilā dūngā.

<sup>22</sup> Main shāhī taḥtoñ ko ulaṭ kar ajnabī saltanatoñ kī tāqat tabāh kar dūngā. Main rathoñ ko un ke rathbānoñ samet ulaṭ dūngā, aur ghoṛe apne sawāroñ samet gir jāeñge. Har ek apne bhāī kī talwār se maregā.”

<sup>23</sup> Rabbul-afwāj farmātā hai, “Us din main tujhe, apne ḳhādīm Zarubbābal bin Siyāltiyel ko le kar muhr kī angūṭhī kī mānind banā dūngā, kyoñki main ne tujhe chun liyā hai.” Yih Rabbul-afwāj kā farmān hai.

**Kitab-i Muqaddas**  
**The Holy Bible in Urdu, Urdu Geo Version, Roman**  
**Script**

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-09-20

---

PDF generated using Haiola and XeLaTeX on 15 May 2025 from source files dated 15 May 2025

123ff8cb-27b3-5817-a02a-22e67145fd30